

# MyWakaf bantu mahasiswa

→ UPM dipilih terajui usaha laksana tabung dana khas

Oleh Faizatul Farhana  
Farush Khan  
ffarhana@bh.com.my

■ Kuala Lumpur

Kementerian Pengajian Tinggi (KPT) bakal mewujudkan tabung dana khas, MyWakaf, yang dapat membantu mahasiswa yang memerlukan bantuan, dalam jangka masa panjang.

Menterinya, Datuk Seri Idris Jusoh, berkata selain itu pe-

nubuhan MyWakaf juga diharap dapat membudayakan konsep wakaf dalam kalangan mahasiswa di negara ini.

Katanya, bentuk pelaksanaan tabung akan dibincangkan bersama Universiti Putra Malaysia (UPM) yang dipilih menerajui usaha terbabit berdasarkan reputasi baik institusi terbabit dalam aktiviti berkaitan.

## Bincang lebih mendalam

“Perbincangan ini masih pada peringkat awal dan kita akan menentukan secara menyeluruh berhubung pelaksanaannya, seperti jumlah peruntukan wang pokok (jumlah modal) dan bila masa yang sesuai untuk mula disalurkan kepada pelajar.

“Secara asasnya, dana ini akan dikumpul melalui usaha

KPT dan sumbangan masyarakat membabitkan organisasi atau individu,” katanya ketika ditemui pada Forum Pendidikan Tinggi (HEF) 2018 di sini, semalam.

Yang turut hadir, Timbalan Menteri Pengajian Tinggi, Datuk Dr Mary Yap Kain Ching; Ketua Setiausaha KPT, Tan Sri Dr Noorul Ainur Mohd Nur dan Pengarah Pusat Pengurusan Wakaf, Zakat dan Endowmen (WAZAN) UPM, Dr Razali Othman.

Bertemakan Ekonomi Islam@4IR (Revolusi Perindustrian 4.0): Kebangkitan Semula Wakaf, forum dua hari bermula semalam itu, bermatlamat menggalakkan perbincangan berhubung mengukuhkan tadbir urus dan membangunkan strategi lebih luas mengenai

penggunaan wakaf sebagai platform kewangan sosial Islam.

Sementara itu, Razali berkata, WAZAN memiliki 17 medium pengumpulan sumbangan, termasuk wakaf secara manual dan atas talian.

Katanya, perbincangan antara KPT dan UPM akan dimulakan dalam tempoh terdekat dan dijangka mengambil masa beberapa minggu, bagi memperhalusi kaedah berkesan untuk dilaksanakan.

“Penyaluran kepada pelajar ini berteraskan cara wakaf, iaitu mereka hanya akan memperoleh dividen daripada jumlah dana pokok untuk perbelanjaan pendidikan, malah lebih menarik, usaha ini membolehkan mereka memiliki akaun untuk tujuan wakaf pada masa depan,” katanya.